

कुलुसि कुलुसि विस्वासुल्लुकुंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

इद सिट्टि कुलुसि सहरता विस्वासुल्लुकुनाहाटीं येसुना प्रेरित पौलुस रासतोर. इद कुलुसि सहर आसिया एरियाते वांता. इगेटा विस्वासुल्लुक पौलुसुनाहेंदाल आयो, गानि कुलुसि सहरतोरै वरोर इपप्रास इनानोना हेंदाल विस्वास कीतुर.

अगाटा कलिसियाते इच्चुर लोकुल्लुक आबदुदम कराहनोर मंतुर इंचि इपप्रासुनाहेंदाल पौलुसुंक तेळियता. ओर तप्पुड बोदा वेहंदुर आनि रीति रिवाजकु, पदुदतकु मत्ताप ताकतेने मुक्ति दोर्कता इंचि करहंदुर.

अदुनहाटीं पायदा हिल्वव दुनियाता रीति रिवाजकु, पदुदतकु कराहनोरा पोल्ले केंजमट इंचि वेहालय पौलुस इद सिट्टि रासि विस्वासुल्लुकुनगा लोहतोर. अल्हेने मिमेट वरोक-वरोर पावरम कीम्टु, विस्वासमते गट्टिगा मंडु, किरिस्तुना पोल्लेते बेस्सेके होंट इंचिगुडा वेहतोर.

बगा बतल मंता

जोहार आनि परिचयम 1:1-8

किरिस्तुना स्वबावम आनि कबळ 1:9-2:19

किरिस्तुनतोन पिस्सना पूना पिस्वर 2:20-4:6

आकिरता बोदां 4:7-18

जोहार

1-2 पेनदा इच्चाताल किरिस्तु येसुना प्रेरित आतोन नना पौलुसुन आनि तम्मुर तिमोतिनाहेंदाल, कुलुसि सहरते मंदना पवित्र अल्हेन किरिस्तुनलोप्पो विस्वासमलायक कलिसियाता लोकुल्लुकुंक इद सिट्टि रासेक मंतन. मना पेनबाबानाहेंदाल मीक कुर्पा, सांति दोर्किकांटी.

दन्यवादता पारतना

3 मोमोट मीवाहाटीं बस्केळक पारतना कीसेके, मना सामि येसु किरिस्तुना पेनबाबांक दन्यवाद कीसेके मंतोम.

4 बारित्ते, किरिस्तु येसुना पोरोटा मीवा विस्वासम आनि अंतोर पेनदा लोकुकुकुन मिमेट कियाना मीवा पावरमता बारेमते केंजतोम.

5 मीवाहाटीं स्वर्गमते उंदि आसे ईसि मंता इंचि, अदुना बारेमते मिमेट मुन्नेने बेसता कबुरता सत्तेम पोल्लेते केंजतिर.

6 अदे बेसता कबुर मिहगा वासि, पूरा दुनियाते पैलांचि लोकुकुकुना पिस्वरतुन बदलांचेके मंता. अल्हेने बस्के अयते अदुन मिमेट केंजतिर, केंजसि पेनदा निजम कुर्पातुन एरपाट कीसि स्विकार कीतिर, अस्केटाल अद मीवा पिस्वरतुनगुडा बदलांचेके मंता.

7 आ बेसता कबुर मावा पावरमगल्ला इपप्रासुनाहेंदाल मिमेट करियतिर. ओर मावातोनि कलियसि कबळ कियानोर आनि मीवाहाटीं किरिस्तुना विस्वासमलायक सेवक आंदुर.

8 पवित्र आत्माते मत्ता मीवा पावरमता बारेमते ओरे माक वेहतोर.

9 अदुनहाटीं मोमोट अव पोल्लें केंजतस्केटाल, मिमेट पूरा आत्माता तेल्चिते, बुद्धिदेते दाना इच्चा मत्ताप निडागोम इंचि बस्केळक पारतना कीसेके मंतोम.

10 इदुनहेंदाल, मिमेट अन्नि तीस्कुने सामिन कूस कियालय मीवा पिस्वर दानकु इस्टमाताप मनंता, मीक हरेक बेसता कबळते पलम दोर्किसि, पेनदा तेल्चिते बेस्सेके दांतिट.

11 दाना महिमाता अन्नि तीरकुना बलमतोनि मीकुन गट्टिगा कीता, अदुनहाटीं अन्नि तीरकुना ओप्के, ओर्सकुनमळ इद मीक आनंदमतोनि दोर्कता.

12-13 अदुनहाटीं पेनबाबांक मिमेट दन्यवाद कीम्टु. ओर मनाकुन वेलगुने मंदना पेनदा लोकुकुकुना वारसानहक्कुते तूस एताना लायक कीतोर. मनाकुन हीकटता कयदाल इळबळिच्चि ओना पावरमगल्ला मरिना राज्येमते होळाहतोर.

14 ओना मरिनाहेंदाले मनाकु मुक्ति दोर्कता, इत्ते ओनाहेंदाल पापालकुनाल मापि दोर्कता.

किरिस्तुंक अन्निनपोरो अदिकारम मंता

15 ओर दिस्सवसोटा पेनदा रूपम आंदुर, ओर दुनिया पुट्टका मुन्नेटाले मत्ताहाटीं, दुनियाते पुट्टवुने अन्निनपोरो पेद्दोड आंदुर.

16 बारित्ते, स्वर्गमते आयि, बूमिपोर्री आयि, दिस्सानव आयि, दिस्सुव आयि, राजगद्दें आयिं, सरकार आयि, पेद्दाल्क आयिर, आदिकारिल्क आयिर इव अन्निन ओनतोनि, ओनाहेंदाल आनि ओनाहाटीं पुटिचमळ जर्गता.

17 पुटिस्ता अन्निने ओरे मोदाटोर, ओनाहेंदाले अन्नि नित्तिसि मंतां.

18 मेंदुललेसीं मंदना कलिसियाकु ओर तल्ला आंदुर. अन्नि पोल्लेने पेद्दोड आयागोम इंचि हातोरा लोप्पोटाल मोट्टा मोदाला तेदतोर ओरे आंदुर. ओरे मोदोल आंदुर.

19 बारित्ते ओनालोप्पो पेनदा गुनम पूरा निंडसि मत्तेने बाबो कूस मनंतोर.

20 कूसुनपोर्री किरिस्तु पोंगागोटता नेत्तुरताहेंदाल, बूमिपोर्री आनि स्वर्गमते मंदना अन्नि वस्तुकुन ओनतोनि कल्पिसि ओरा नड्डुम साति मनागोम इंचि पेनदा इच्चा.

21 दीनकन्ना मुन्ने मिमेट पेनदागटाल लक्कु मत्तिर, कराब कबाह्कुनाहेंदाल दाना पगातोर आसि मत्तिर.

22 इंदके मीकुन पेनदा मुन्ने पवित्र, डाग हिलाकोटा, दोसेम हिलाकोटा निल्हागोम इंचि ओर ओना हामुरहेंदाल मीवा मेंदुल्ला हव्वितुन ओना मेंदुल्ले कल्पकत्तोर.

23 गानि मिमेट विस्वासमते हीके-हेके आयाकुंटा गट्टिगा निल्सि मंटु, मिमेट केंजता बेसता कबुरता आसेतुन होळसमट. अद बेसता कबुर मब्बुन हिळता अंतोर लोकुल्लुकुं वेहमळ जर्गसेक मंता. अदे सेवा कियानाहाटीं नना, इत्ते पौल्लुसुन पेनदा सेवक आतन.

कलिसिया बेर्सानाहाटीं पौल्लुस तकलिप अरमळ

24 किरिस्तुना मेंदुलतसोंटा कलिसियाताहाटीं बव्यते बादां तक्को मत्तां. अव बादन नावा मेंदुलताहेंदाल पूरा कीसेके मंतन, अदुनहाटीं इंदके मीवाहाटीं बव्यते नावा दुक्काल्क मंतां अवुने नना आनंदमते मंतन.

25-26 पेनदा पोल्लेतुन मीकु पूरा वेहानाहाटीं पेन नाक अप्पजेपता जिम्मेदारिहेंदाल नना कलिसियाता सेवकुन आतन. अद पोल्ले वेल्लेन कालाल्कुनाल, पीळि-पीळिनाल मर्ममते मत्ता, गानि इंदके दाना पवित्र लोकुल्लुकुं तेळियागोटता.

27 यहुदि आयवोरा लोप्पो इद मर्ममता महिमाता विलुवा बतल आंद मना लोकुलकुंक तेळियाना इंचि पेन इनकुल्ला. मीवालोल्लोपो महिमाता आसे आसि मनना किरिस्ते आ मर्मम आंद.

28 हरेक मनकन किरिस्तुनलोप्पो पूरा कीसि पेनदा मुन्ने निल्हागोम इंचि, मोमोट किरिस्तुना बारेमते हरेक मनकंक कडकते वेहांतोम, हरेक मनकंक पूरा तेळ्विते करहंतोम.

29 इदुनहाटीं किरिस्तुना पूरा ताकत नावा लोप्पो गट्टिगा कबळ कीसेके मंता, दानाहेंदाल नना मनसु दोस्सि बागा कस्टम कीसेके मंतन.

2

1 मिमेट नाकुन ह्ळाकोन्ना गानि मीवाहाटीं, लोदिकिया सहरते मंदना विस्वासुल्लुकुनाहाटीं आनि कळमता अंटोर विस्वासुल्लुकुनाहाटीं नना वेल्लेन कस्टम कीसेके मंतन, इद मीक तेळियाना इंचि नावा इच्चा मंता.

2-3 इद कस्टम बारि कीसेके इत्ते, मिमेट मीवा विस्वासमते दैरनेमते मनना, मिमेट पावरमते वरोंक-वरोर कलियसि मंदना, मीक पूरा बुद्धिदेता पूरा दनम दोर्कना, पेनबाबाना मर्मम इत्ते किरिस्तुना लोप्पो मक्किस मल्ला बुद्धि, तेळ्विता कजानातुन एरपाट कियाना.

4 बोरन्ना तिथ्यटा पोल्लेनतोनि मीकुन पसांचामन्नि इंचि नना इद वेहासेक मंतन.

5 नना मेंदुल्लेते मिहागटाल लक्कु मंतन, गानि आत्माते मिहागेन मंतन. मीवा रोजता पिस्वर आनि किरिस्तुनलोप्पो मंदना मीवा गट्टि विस्वासम ह्ळसि नाक वेल्लेन कुसि आसेक मंता.

किरिस्तुनलोप्पो निंडिसि मंतिर

6 इंदके मिमेट किरिस्तु येसुन सामि इंचि स्विकार कीतिर, अयते ओर बल्हा वेहतोर अल्हेने ताकाट.

7 मराता हिहकुनलेसीं मिमेट किरिस्तुनलोप्पो होळियसि होंटु, बेस्सेके होंटु. मीक कराहतालेसीं विस्वासमते गट्टिगा आसेके होंटु, बस्केळक पेनदुक दन्यवाद कीसेके मंटु.

8 मिमेट जेगर्तीते मंटु! बोरन्ना वासि मीकुन दुनियाता तेळ्वि पोल्लें, एर्तम दोका हिथ्यना पोल्लें वेह्चि पसांचा परांतुर, अव पोल्लें मनकालोर्कुना

रीतिरिवाजकुनालेसी, दुनियाते एनकटा कराहता पोल्लेनलेसीं मंतां गानि किरिस्तुना पोल्लेनलेसीं हिल्लें.

9 बारित्ते पेनदाव अन्नि गुनाल्क किरिस्तुना मेंदुल्ले मनंतां.

10 अंटोर राज्येम कियानोर्कुनपोर्रो, अदिकारकुनपोर्रो किरिस्तु तल्लालेसीं मंतोर, ओनालोप्पो मिमेट पूरा आतिर.

11 मीवा मेंदुल्ला पापाल्क पायताहाटीं ओनालोप्पो मीकुन कतना कियमळ जर्गता. अद कतना कय्दे कीतद आयो गानि किरिस्तुनलोप्पो कीतद आंद.

12 अचोने आयाका, मिमेट बापतिस्मा एतताहेंका किरिस्तुनतोनि बोंदा दोस्ताप आतिट. हातोरव्टेटाल ओन जीवाते तेहाता पेनदा सक्ति पोर्रो मिमेट विस्वासम इस्ताहाटीं ओनतोनि जीवातेगुडा तेदतिट.

13 मिमेट तप्पु कबाहक कीतिर, यहुदि आयवोर मत्तिर, अदुनहाटीं आत्माते हासि मत्तिर. गानि पेन मना अन्नि पापाल्कुन मापि कीसि किरिस्तुनतोनि मीकुन जीवाते तेहता.

14 नियमकुना पुस्तकम मनाकु विरोदमते मत्ता, गानि पेन किरिस्तुन कूसुनपोर्रो मोल्लां कोहिकिसि अद पुस्तकमताल मनाकु विरोदमते मत्ता पोल्लें तेंडसि पोहता.

15 इल्हा राज्येम कियानोर्कुंक आनि अदिकारकुंक पेन ताकत हिलाकोँटा कीता. कीसि किरिस्तु कूसुनपोर्रो जीवा हीसि गेल्सताहाटीं ओरा अंटोरा मुन्ने तमासा आसि सिग्गु हिलाकोँटा आता.

16 अदुनहाटीं मीवा तिनना-उनना बारेमते आयि, पंडुगुना बारेमते आयि, अमासा हिलाकोँटे नोमकेम रोजुना बारेमते आयि बोर्कुने मीवा न्यायम किया हियमट.

17 इवन्निगुडा मुन्ने वायाना निजम पोल्लेना नीडा आंदु, आ निजम पोल्ले किरिस्तु आंदुर.

18 बोरेन्ना सतागा सिन्नातनम हूपिचुकुनानोर, दूताना पूजा कियानोर, हळता पोल्लेनपोर्रो, ओना मनसुना पालतु पोल्लेनपोर्रो पेद्दिदरकेम कियानोना हेंदाल मीवा पेनदा इनामतुन तपिचुकुना हियमट.

19 असोंटा मनकल पूरा मेंदुल्ला कील्कुन, नराल्कुन उंदि कीसि, पेनदाहेंदाल मेंदुल्लुन बेर्सांगोटना तल्ला, इत्ते किरिस्तुन पीसि मन्नोर.

20-21 गानि इंदके मिमेट दुनियाता पोल्लेनाल किरिस्तुनतोनि हासि होत्तिर, अय्ते “अद इटमट, अदुन तिनमट, अदुन पियमट” इंचि दुनियातोरालेसीं नियमकुने बारि ताकसेक मंतिट?

22 इवन्नि पोल्लें वाळकुत्तारित्ते नासडेम आसि होनना वस्तुकुनलेसीं मंतां, बारित्ते अव सिराप मनकना नियमाल्क आनि कराहमळक संबंदिस्तव आंदुं.

23 इव नियमकुने मना मनसुनाल तयार कीता बक्ति क्रियालय, सिन्नातनम हुपिचकुनालय, मना मेंदुल्लतुन तीराता कस्टम कीकुनालय बुद्धि अय्ते मंता, गानि मना मेंदुल्ला कराब इच्चान आपालय इव बतल कबळक ओज्जो.

3

1 मिमेट किरिस्तुनतोनि जीवाते तेदसि मंतिट, किरिस्तु स्वर्गमते पेनदा तिना बाजुंक उदसि मंतोर, अय्ते अगाटा पोल्लेन दोर्किचकुनना कोसिस कीम्ट.

2-3 इंदके मीवा पडाना पिस्वर हासि होत्ता आनि मीवा पूना पिस्वर किरिस्तुनतोनि पेनदा लोप्पो मक्किचि मंता. अदुनहाटीं मिमेट बूमिपोर्रीटा पोल्लेने आयो गानि स्वर्गमता पोल्लेने मनसु ईरंट.

4 मनाकु पिस्वर हीता किरिस्तु बस्के अय्ते मर्रा दिस्सानुर, अस्के मिमेटगुडा ओनतोनि ओना महिमाते दिस्किर.

पळाना पिस्वर आनि पूना पिस्वर

5 अदुनहाटीं बूमि पोर्रीटव मना कराब गुनाल्क इत्ते बोगमतनम, कराब विचाराल्क, जोसते मनमळ, इंकावरोनद आसे पडमळ, आस्ति कियमळ इद अय्ते बोम्मांक मोळकता लेक्कातेन वांता. इव अन्निन हव्किस पोहाट.

6 इवुनाहाटींगे पेनदा होंग दाना पोल्ले केंजवोरा पोर्री वांता.

7 मिमेटगुडा मुन्ने आ पिस्वरते पिसानस्के, ओरालेसींगे ताकिदिर.

8 गानि इंदके मिमेट होंग आयमळ, गुल्गमळ, पगा पियमळ, अपमानम कियमळ, तोळदाल कराब पोल्लें वळकमळ इवन्निन होळसीम्टु.

9 मिमेट वरोंक-वरोर आबद्दम वळकमटु, बारित्ते मीवा पडाना गुनमतुन आनि दाना कबाह्कन तेंडसि पोहतिर.

10 इंदके पूना पिस्वर पिसमळ सुस्व कीतिर, मनाकुन पुटिस्ता पेनदा गुनम मत्ताप, मिमेट तेल्वि दोर्किचकुनालय पूनगा तयार आसेक मंतिट.

11 इवने युनानि आयिर, यहुदि आयिर, कतना कीतोर आयिर, कतना कियवोर आयिर, केडाते मनानोर आयिर, स्कूति जातितोर्क आयिर, दासुड आयिर, दासुड आयवोर आयिर ईरा लोप्पो बतल तेडा हिल्ले. किरिस्तु अन्निने, अंतोर लोप्पो मनंतोर.

12 पेन मीकुन पवित्र आनि पावरमगल्ला लोकुकुनलेसीं पेर्कुत्ता. अदुनहाटीं दया कियमळते, पायदा कियमळते, सिन्नागासि मनमळते, सादा-सिंपल मनमळते ओप्के पीसि ताकट.

13 सामि मीवा तप्पुकुन मापि कीतोर, अय्ते मिमेटगुडा वरोना तप्पुकु वरोर मापि कीम्टु. मीलोप्पो बोनकन्ना इंकावरोन पोरो बतलन्ना तप्पु दोस्साना मत्ते, ओर ओप्केते वरोनद वरोर तप्पुकुन मापि कीकुंटु.

14 अचोने आयाका मिमेट अंटोर उंदासि पावरमते दोहताप मंटु.

15 मीवा मनसुने किरिस्तुना सांतिता राज्येम ताकिकांटी, इदुनहाटीगे मीकुन उंदि मेंदुल आसि केयमळ जर्गता. पेनदुक बस्केळक दन्यवाद कीम्टु.

16 किरिस्तुना पोल्ले मीलोप्पो निंडिसि मन्निकांटी, मिमेट पूरा तेल्चिते वरोक-वरोर करहट, तेळियागोट्टिस वेहाट्टु, पेनदुक दन्यवाद कीसेके मना मनसुनाल बजनकु, कीर्तनकु, पाटां पारसेके होंटु.

17 अचोने आयाका, पोल्ले आयि, कबळ आयि बतल किथ्यिना मिमेट सामि येसुना पोरोलतेन कीम्टु. ओनाहेंदाले पेनबाबांक दन्यवाद कीम्टु.

पूना पिस्वरते मनमळ

18 मरमि आता मुरताहकुनिटा! मिमेट पेनदुक नच्चानालायक मीवा मुय्दुर्कुना पोल्लेपोरो ताकट.

19 मुय्दुर्कुनिटा! मीवा मुत्तोहकुन पावरम कीम्टु, अवुनतोनि कडकते मनमट.

20 पिलालकुनिटा! मिमेट अन्नि पोल्लेने मीवा यावल-बाबाल वेहताप ताकट, इल्हा ताकते सामिक आनंदम आंता.

21 बाबोरिटा! मिमेट मीवा पिलालकुन चिड-चिड कियमट, अल्हा कीते, ओर निरास आंतुर.

22 दासुलकुनिटा! मिमेट अन्नि पोल्लें ई दुनियाते मनना मीवा मालकुलक वेहताप कीम्टु. मिमेट कियानद मनकालोर्कुन कूस कियाना दासुनलेसीं हुप्सालय आयो गानि बेस मनसुने, पेनदा वेरेंते कीम्टु.

23-24 मिमेट बतलयते कीतिर मीवा मनसुनाल कीम्टु, मिमेट मनकालोर्कुनाहाटीं आयो गानि सामिनाहाटीं कीसेके मंतिट. मिमेट सामि किरिस्तुना सेवा कीसेके मंतिट. अदुनहाटीं ओनाहेंदाल मीकु वारसानता इनाम दोर्कता, इद मीकु एरपाटे मंता.

25 पेन बोने मोकम हूळसि न्यायम किय्यो, बोर अय्ते तप्पु कींतोर, दाना सिक्सा ओनकु दोर्कता.

4

1 मालाकुल्लकुनिटा! स्वर्गमते मीकुगुडा वरोर मालक मंतोर, इदुन मति ईसि मिमेट मीवा दासुल्लकुनतोनि न्यायमते, बेदबाव हिलाकोटा ताकट.

पारतना कियालय वेहमळ

2 मिमेट बस्केळक पेनदुक पारतना कीसेके मंडु. दानकु दन्यवाद कीसेके जेगर्तते मंडु.

3 नना किरिस्तुना मर्ममता पोल्ले वेहताहाटी जेलते मंतन, इदे पोल्लेतुन मोमोट अंतोर्क वेहानाहाटी पेन माकु मोका हिच्ये इंचि मावाहाटीगुडा पारतना कीम्टु.

4 नाकु बल्हा वेहाना मंता अल्हेने नना इद कबुरतुन बेस तेळियागोट्सि वेहानाहाटी पारतना कीम्टु.

5 विस्वासम कियवोरतोनि बेस तेळ्विते ताकट, मोका दोर्कतस्के ओर्क बेसता कबुर वेहाना पायदा तप्पाकोटा एतट.

6 हरेक मनकंक बेस जवाब हिया वायमळ गावाले इंचि मीवा पोल्ले बस्केळक कुर्पाते आनि होव्वोर वाटते रूसि मत्ताप मना पीता.

आकिरता पोल्लें

7 पावरमगल्ला तुकिकुस दादल विस्वासमलायक सेवक आंदुर. ओर नावा बारेमते अन्नि पोल्लें मीक वेहांतोर, ओर नावातोनि कलियसि सामिन लोप्पो सेवा कियानोर आंदुर.

8 ओर मावा बारेमते अन्नि पोल्लें मीक तेळियागोट्सि मीवा मनसुकुंक दैरनेम हियाना उद्देसमते नना ओन मीहेके लोहतन.

9 नना ओनतोनि मीवा लोप्पोटोरे विस्वासमलायक, पावरमगल्ला उनेसिम दादानगुडा लोहतन, ओर इग्गेटव अन्नि पोल्लें मीक वेहानुर.

10 नावातोनि जेलने मनना अरिसतरकुस पोरोलतोर दादल मीक जोहार वेहासेक मंतोर, अल्हेने बरनाबासुना दग्गेटा दादाल मरकुस इनानोरगुडा मीक जोहार वेहासेक मंतोर. (नना मीक मुन्नेने वेहताप, मरकुस मिहगा वाते ओन बेस हूळट.)

11 युसतुस इनना येसुगुडा मीक जोहार वेहासेक मंतोर, कतना आतोराव्टेताल सिराप ईर मुव्वुरे पेनदा राज्येमताहाटीं नावातोनि कबळ कीसेक मंतुर, ईराहेंदाल नावा जीवाक सांति दोर्कसेक मंता.

12 किरिस्तु येसुना दासुड इपप्रास ईर मीवा लोप्पोटोरे आंदुर, मीक जोहार वेहासेक मंतोर. मिमेट पेनदा इच्चा मत्ताप पुरागा आसि, विस्वासमते गट्टिगा निल्लिस मनागोम इंचि ओर बस्केळ्ळक मीवाहाटीं जोर हीसि पारतना कीसेके मंतोर.

13 मीवाहाटीं, लोदिकिया आनि हियरापोलि सहरता विस्वासुल्कुनाहाटीं ओर वेल्लेने मेहनत कीसेके मंतोर इंचि, इद पोल्लेक नना ओना गवाइ मंतन.

14 पावरमगल्ला डाक्टर लूकाल आनि देमास ईर मीक जोहार वेहासेक मंतुर.

15 लोदिकियाता विस्वासुल्कुंक आनि नुंपा अक्कांक अल्हेने दाना लोतागा जमा आयाना कलिसियातोर्कुंक नावा जोहार वेहाट.

16 इद सिट्टिटुन मिमेट हदुव्ता पजा, इदुन लोदिकिया सहरता कलिसियातोर्क लोहचि, अगागुडा हदवा वेहाट आनि लोदिकियाताल वाता सिट्टिटुन मिमेटगुडा मीवा कलिसियाते हद्विसि वेहाट.

17 अल्हेने अरकिपुसुंक, “सामि नीकु अप्पजेपता सेवातुन तप्पाकोटा पूरा कीम,” इंचि वेहाट.

18 नना पौलुसुन, नावा कय्देन रासि मीकु जोहार वेहासेक मंतन, नना जेलते मंतन इंचि पारतनाते मति कीम्ट. पेनदा कुर्पा मीवातोनि मन्निंकांटी. आमेन.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068